

Asasakka maani ilissi najuuttusi.

Asasakka Ittoqqortoormiini innuttaasut. Naak ungasikkaluartusi, eqqarsaatitsinni najorpatsigit.

Asasakka Paamiormiut Arsummiullu – kissalaartumik inuulluaqqusivugut.

Asasakka sermersuup illuatungaaniittusi - Tasiilaq, Isortoq, Kulusuk, Kuummiut, Sermiligaaq kiisalu Tiilerilaaq. Inuiattut ullorsiornermik pingaartitsisartusi nalunngilara, ullumikkullu nalliuttorsiornitsinni eqqarsaatigingarpatsigit.

Minnerunngitsumillu ilissi Nuummiittusi nunaqarfinnilu Kapisilinni Qeqertarsuatsiaanilu – Inuiattut ullorsiornitsinni pilluangaaritsi.

Soorunalimi aamma nunatsinni innuttaasut – aamma ilissi pilluangaaritsi.

Juunip 21-iat tassaavoq ulloq immikkuullarissuq, inuppassuarnik qilanaarineqartartoq. Tassa kalaallit inuiattut ullorsiorfiat. Ulloq una ullunik allanik immikkuullarinneruvoq. Ullormi tassani asasagut peqatigisarpagut. Katerisimaartarpugut, nuannisaqatigiittarpugut ullorlu ataatsimoorluta malunnartittarpagut, inuiattut killiffippugut malunnartinniarlugu.

Kalaallisoorluta inuiattut persuarsiorluta ataatsimoorpugut. Hans Egede-p tikinneraniit ineriartorsimaqaagut. Inuiattut tulluusimaartuuvugut ileqqorpassuaqarlutalu.

Meerartagut pillugit persuarsioritaqaagut, atualeraangata, atuarfimmi ilinniakkamminnilluunniit naammassigaangata, apersortikkaangata, perngaraangataluunniit paggattorsuusarpugut, taamaattumik inuiattut ullorsiornermi ileqqorisalernikuusarpugut puseeqqaanniuunneq pissangarluinnartumingaasiit maanna aallartereerpoq. Kinamita pisaqaaqaassava! Ullumilu paggannersaarsuarmi peqataajumaartusi neriuutigaara.

Nunannguarput kusanaqisoq ukiuunerani apummik qaqqorimmik qallerneqartarpoq aasakkullu aamma kusanangaartarluni. Naasut qalipaatiqissut takussaalersarpugut illoqarfiillu nunaqarfiillu aamma uummarissarlutik.

Maani kommunitisinni uummarissaasut ilagaat sumiorpaluussutsit. Aqqusinermi pisukkaanni tusarsaasut tassaasarpugut "ajunng, ajunngii, qaniippi, ajinngi, hvordan har du det, How are you" tassa nunarsuarmioqataanitta ersersiutai.

Assigiinngissuseq pillugu Nakuusa-p meerartai pillugit sammisaqartinneqaramik oqariartuutigivaat assigiinngissuseq akuerissagippugut. Kissaatigaat pikkorinnerulissasugut tikilluaqqusissalluta tamatta ataasiakkaatut, uagullu inersimasut pisussaaffigaarpugut maligassiuissuussalluta. Taamaasiornitsigut qinngasaaruttarneq aamma millisaaffigissagatsigu, ukiormannalu "ikinngutaalluarpit" ingerlanneqartumut tapertaalluarluni. Ikinngutaalluaruttami inuiaqatigiittut aamma nukittunerulissaagut.

Aasaanerani aamma inuusuttorpasuit ilinniarnerminnik naammassisarpugut. Inuusuttut meeqqat atuarfiat ilinniarfiillu allat qimattarpaat inuunerminnik alloriaqqinniarlutik.

Takorluuisinnaaneq pisariaqarpoq, takorluuinermi tassaavoq inuunitsinni pingaartitatsinnik siunniussa qarusunneq. Inuppassuit imminnut aporfilersuisarput oqarlutik "iluatsinnaviangilaq". Taamaattorli pisariaqarpoq sinnattunik takorluuisinnaaneq. Imaassinnaavoq takorluukkatit piffissap qanittup sivisunerulluunniit iluanni piviusunngortut.

Allannguerusunnermik takorluugaqarneq.
Kalaallit Nunaanni iluatsittumik inuuneqarnermik takorluuineq.

Imaluunniit nammineq initaarnissamut takorluuineq immaqaluunniit nunarsuarmi angalanissamut takorluuineq. Ila, kinamita takorluuinikuunngila?

Uagut politikikkut takorluugaraarput kommunerput ilaqutariinnut najoruminartuunissaa. Meeqquqeriviit, meeqqat atuarfii minnerunngitsumillu ornittakkat meerartatsinnut tulluarsarnissaat anguniassallugu. Meeqqat innarluutillit ajunnginnerusumik siunniissaqartikkumallugit sulineq nangissavarput, inuiaqatigiinnimi assigiinngitsuugaluarluta tamatta naleqarpugut aamma pisariaqartinneqarpugut.

Nunarsuarmi kusanarnerpaat ilaanni najugaqarpugut. Maani toqqissisimalluta inuuvugut.

Covid 19 pillugu annertuumik oqaaseqarniingilanga. Taamaattorli oqaatigisinnaavara inuiaqatigiinni sunniuteqangaatsiarsimammat.

Inuiaqatigiisugut immitsinnut paarilluarsimavugut pisortallu innersuussutaannik malinnissimalluta. Naak corona peqqutaalluni inuunerput allanngoraluartoq, inuiaqatigiittut qaninnerulersimavugut. Immitsinnut paarilluarsimavugut sulilu tamanna attatiinnassavarput. Pingaartumik ullumi nualluussuup tuniluuttoqarnerani katersuunnitsinni eqqaamallugu immitsinnut ungasilluta nalliuttorsioqatigiissagatta.

Inuiaqatigiit iluatsittut tapersersoqatigiittarput, aamma anorersuit takkukkaangata immaqaluunniit ulluni arlalinni silarloreerluni seqininnguaq takkukkaangat. Tassa Kalaallit pikkoriffiisa ilaat – ikioqatigiinneq.

Tamatta akisussaaffeqarpugut – siunniussagut iluatsissappata.
Tamatta akisussaaffeqarpugut – inuiaqatigiinni ajunnginnerpaamik peqqinnartumillu inuuneqassagutta.

Meerartagut pitsaanerpaamik tungavissaannik tunisigit.
Inuusuttortagut neriummik tunisigit.
Utoqqartagullu isumassarsiorfigitigit.

Ullorlu una pingaarutilik ataatsimoorluta nalliuttorsiuutigigit.

Asasakka ilissi maani katersuuttusi.

Inuiattut ullorsiorluarnissassinnik kissaappassi!